

TUSITAIALA MO LE

AIGA

T U S I T A I A L A M O L E

AIGA

Lolomiina e  
Le Ekalesia a Iesu Keriso o le Au Paia o Aso e Gata Ai  
Aai o Sate Leki, Iuta

© Puletaofia 1992, 1999, 2001, 2006 e le Intellectual Reserve, Inc.

Ua taofia aia tatau uma

Lolomiina i le Lunaite Setete o Amerika

Faamaonia le faaPeretania: 2/06

Faamaonia le faaliliuga: 2/06

Faaliliuga o le *Family Guidebook*  
Samoan

# Faasino Mataupu

---

“O Le Aiga: O Se Folafolaga i le Lalolagi”	iv
Faatulagaga ma le Faamoemoega o le Aiga	1
Aoaina Atu o le Talalelei i Totonu o le Aiga	5
Faataunuaina o Tiutetauave Faaleaiga	14
Aoaga Faaleautaitai	18
Faia o Sauniga Tapuai i le Fale (Mo Aiga i Eria e Motu Mamao Ese)	19
Sauniga ma Faamanuiaga o le Perisitua	21
O Le Mauaina o Tusi ma Mea e Faaaoga a le Ekalesia ma le Sailia o Faamatalaga i Talafaasolopito o Aiga	29

---

# “O Le Aiga: O Se Folafolaga i le Lalolagi”

---

I le 1995, na tuuina mai ai e le Au Peresitene Sili ma le Korama a Aposetolo e Toasefululua le “O Le Aiga: O Se Folafolaga i le Lalolagi.” O lenei folafolaga o se tautinoga ma se toe faamautuina o aoaoga faavae ma tulaga e ola ai, ia sa atulasi ona ta’u mai e perofeta i le talafaasolopito atoa o le Ekalesia. O loo aofia ai mataupu faavae e matua taua mo le fiafia ma le manuia o aiga uma. E tatau i tagata o le aiga ona suesue i le folafolaga ma e tatau ona ola ai i ona mataupu.

---

“O i matou o le Au Peresitene Sili ma le Aufono a le Au Aposetolo e Toasefululua O Le Ekalesia a Iesu Keriso o le Au Paia o Aso e Gata Ai, matou te tautino atu ma le faamaoni, o le faaipoipoga i le va o se alii ma se tamaitai, ua faauuina e le Atua, ma o le aiga o le totonugalemu lea o fuafuaga a Le Fofoa, mo le taunuuga e faavavau o Lana fanau.

“O tagata soifua uma—tane ma le fafine—ua foafoaina i le faatusa o le Atua. O i latou taitoatasi o se atalii po o se afafine faaleagaga faapelepele a ni matua faalelagi, ma o lea ua tofua ai i latou taitoatasi ma se natura ma se taunuuga paia. O le tulaga tane po o le fafine (o le tagata), o se vaega taua lea o le muai olaga, olaga faitino, ma lona faamoemoe e faavavau.

“I le muai olaga, sa iloa ma tapuai atalii ma afafine faaleagaga i le Atua o lo latou Tama e Faavavau, ma sa [latou] talia Lana fuafuaga e mafai ai e Lana fanau ona maua ni tino faaletino ma le tomai faalelalogi latou te maua ai le atoatoaga ma iloa tino ai lona taunuuga paia o se suli o le ola e faavavau. O le fuafuaga paia o le fiafia, ua mafai ai ona faaaauu fegegaleaiga

faaleaiga i tala atu o le tuugamau. Ua mafai i sauniga paia ma feagaiga ua maua i malumalu paia ona toe foi atu ai tagata taitoatasi i le afioaga o le Atua ma toe faatasia aiga e faavavau.

“O le uluai poloaiga na tuuina e le Atua ia Atamu ma Eva, e faatatau i lo la agavaa mo tulaga faamatua, o se tane ma se ava. Matou te tautino atu o le poloaiga a le Atua i Lana fanau ia fanafanau ma ululuola ai le lalolagi, ua faamalosi ma faatumauina. Matou te toe tautino atu foi ua poloai mai le Atua, o mana paia o le foafoaina o fanau, ua na o le va lava o le alii ma le tamaitai ua faaipoipoina faaletulafono, o se tane ma se ava, e tatau ona faaogaina ai.

“Matou te tautino atu o le ala ua foafoaina ai le ola faitino, ua faatuina i le finagalo paia. Matou te faamaonia le paia o le ola ma lona taua i le fuafuaga e faavavau a le Atua.

“O le tane ma le ava ua i ai le tiutetauave paia e alofa ma tausie e le tasi le isi ma a la fanau. ‘O fanau o le tofi lea mai le Alii’ (Salamo 127:3). Ua i ai i matua se tiute paia e tausie a latou fanau i le alofa ma le amiotonu, ia

tuuina atu i ai mea e manaomia i le faaleagaga ma le faaletino, ia aoao i latou e alolofa ma feauaunaai, ia tausia poloaiga a le Atua ma aveva ma tagatanuu usiusitai i tulafono i soo se mea e nonofo ai. O tane ma ava—tina ma tama—o le a latou tali atu i le Atua mo le faataunuuina o nei mea e ao ona faia.

“O le aiga ua faauuina e le Atua. O le faaipoipoga i le va o le alii ma le tamaitai e taua i Lana fuafuaga e faavavau. E tatau ona fanauina fanau i totonu o feagaiga o le faaipoipoga, ma ia tausia e se tama ma se tina o e ua faamamaluina ma le faatuatua atoatoa feagaiga faaleulugalii. E maua le fiafia i le olaga faaleaiga pe a faavae i aoaoga a le Alii o Iesu Keriso. O faaipoipoga ma aiga manuia, e faavae ma tumau i mataupu faavae o le faatuatua, tatalo, salamo, faamagaloga, faaaloalo, alofa, agalelei, galuega, ma gaoioiga faafiafia tuufaatasi. I le fuafuaga paia, e tatau ona pulefaamalumu tama i o latou aiga i le alofa ma le amiotonu, ma o i latou e tuuina atu mea e manaomia o le olaga ma le

puipuiga mo o latou aiga. O le uluai matafaioi a tina o le faafaiileina lea o a latou fanau. O nei matafaioi paia, e ao i tama ma tina ona fesoasoani le tasi i le isi o se paaga tutusa. O mea e faaletonu, oti, po o nisi mea e tulai mai, e alagatau ai ona fetuutuunai tagata taitoatasi. E tatau i aiga lautele ona tuuina atu le lagolago pe a manaomia.

“Matou te lapatai atu o tagata taitoatasi o e ua solia feagaiga o le ola mama, o e faasaunoo i taitoalua po o fanau, o e ua faatalale i le faataunuuina o tiutetauave faaleaiga, o le a i ai se aso tou te tutu atu ai e tali atu i luma o le Atua. E le gata i lea, matou te lapatai atu foi, o le faamalepeina o le aiga o le a aumai ai i tagata taitoatasi, alalafaga, ma malo, faafanoga ia na uluai tau mai e perofeta anamua ma aso nei.

“Matou te valaau atu i tamalii ma failauga ma taitai o malo i soo se mea ina ia faalauiloa atu na fua faatatau ua fuafuaina ina ia faatumauina ma faamalosi le aiga o se iunite faavae o malo” (*Liahona*, Iuni. 1996, 10).



# Faatulagaga ma le Faamoemoega o le Aiga

---



## Faatulagaga

O le aiga e paia i totonu O Le Ekalesia a Iesu Keriso o le Au Paia o Aso e Gata Ai, ma o le iunite aupito taua faalevafealoai lea i le olaga nei ma le faavavau. Ua faatuina e le Atua aiga ina ia maua ai e Lana fanau le fiafia, ma faatagaina ai i latou e aoaoina



mataupu faavae sa’o i se siosiomaga alofa, ma saunia ai i latou mo le ola faavavau.

O le aiga o le nofoaga sili lea e aoao atu ai, e aoao mai ai, ma faaaoga ai mataupu faavae o le talalelei. O iina e aoao ai e tagata taitoatasi le saunia o meaai, lavalava, malutaga, ma isi mea latou te manaomia. O le tama ma le tina, i le avea ai o i laua o se paaga tutusa, e tatau ona fesoasoani i tagata taitoatasi o le aiga ia:

- Saili le upumoni ma atiina ae le faatuatua i le Atua.
- Salamo i agasala, ia papatiso mo le faamagaloina o agasala, ia avea ma se tagata O Le Ekalesia a Iesu Keriso o le Au Paia o Aso e Gata Ai, ma maua le Agaga Paia.



- Usitai i poloaiga a le Atua, suesue ma le maelega i tusitusiga paia, ia faia tatalo a le tagata lava ia i aso taitasi, ma ia auauna atu i isi.
- Fetufaai atu le talalelei i isi.
- Ia maua faaeega paia ma ia faaipopopo i le malumalu i se soa agavaa mo le faavavau, ia fausia se aiga fiafia mo le auaiga, ma ia lagolago le aiga i le alofa ma le ositaulaga.



- Ia sailia faamatalaga e uiga i auaunatuaa ua malilili ma faia sauniga o le malumalu mo i latou.



- Ia saunia ia meaai e manaomia mo le soifua maloloina faaleagaga, faalevafealoai, faaletino, ma le faalelagona.

O le tama e pulefaamalumalu i le aiga ma e nafa ma le aoaoina o fanau ma saunia mea e manaomia o le olaga mo le aiga. O se tama agavaa ma tauaogaina i totonu o le Ekalesia ua i ai le avanoa e umia ai le perisitua, o le pule ma le mana lea e galue ai i le suafa o le Atua. O lenei pule ma le mana, e avea ai le tama ma taitai perisitua i lona aiga. Na te taitaia ai lona aiga ma sauniuni ai e toe foi atu i le afioaga o lo tatou Tama Faalelagi. O lona toalua o lana soa, paaga, ma le fesoasoani aupito taua lea. E tatau i le tane ma le ava ona fefautuaai faatasi i mea uma lava e aafia ai le auaiga ma le aiga.

E tatau i le tama ona saunia mea faaleagaga e manaomia e lona aiga. E tatau ona ia vaai o loo aoaoina i latou i le talalelei a Iesu Keriso ma e tatau foi ona ia faia mea uma na te mafaia e uunaia ai i latou ma fesoasoani ia i latou ia ususitai i poloaiga a le Alii.

E mafai e se tama o loo umia le perisitua ona faamanuaina tagata o lona aiga ma saunia o latou manaoga faaleagaga. O le pule o le perisitua e tatau ai o loo i ai faatasi *ma le faamatoniga po o se faatagaga mai lona taitai perisitua*, e mafai ai e le tama ona:

1. Faaigoa ma faamanuia le fanau.
2. Papatiso le fanau (ma isi).
3. Faamau le fanau (ma isi) tagata o le Ekalesia ma faaee atu i o latou luga le Agaga Paia.
4. Faaee le perisitua i luga o ona atalii (ma isi) ma faaui i latou i tofi o le perisitua.

5. Faamanuia ma tufatufa le faamanatuga.

6. Faapaia tuugamau.

E mafai e se tama o loo umia le Perisitua Mekisateko, *e aunoa ma se faamaoniga mai lona taitai perisitua*, ona faapaia le suauu ma faamanuia tagata o lona aiga ma isi pe a mamai ma tuuina atu foi i ai ni faamanuiaga faapitoa i isi taimi pe a tulai mai se tulaga e manaomia ai. (Tagai itulau 21–28 o lenei tusitaiala mo faatonuga i le faataunuuina o sauniga ma faamanuiaga faaleperisitua.)

E ao i le tama ona vaai o loo faataunuuina atoatoa e lona aiga tiute faavae e tolu:

1. Saunia o le tagata lava ia faapea foi le aiga i le faaleagaga ma le faaletino.
2. Fetufaai atu le talalelei.
3. Talafaasolopito o le aiga ma sauniga o le malumalu mo e ola ma e oti.

O le tina o se paaga tutusa ma se faufautua i lana tane. E fesoasoani o ia i lana tane e aoao a laua fanau i tulafono a le Atua. Afai e leai se tama i le aiga, e pulefaamalumalu le tina i le aiga.

E tatau ona tasi le faamoemoega o le tama ma le tina. O la la'ua sini e tatau ona i ai o le saunia lea o tagata uma o le aiga ina ia toe foi atu i lo latou Tama Faalelagi. E tatau ona lotogatasi i laua a o la galulue mo lenei sini. Ua faatuina e le Alii le Ekalesia ina ia fesoasoani ai i tama ma tina e aoao ma tausia o latou aiga.

Afai e oo mai fanau i totonu o le aiga, e ao i matua ona alolofa ia te i latou, aoao i latou i upumoni o le talalelei, ma ia avea ma faataitaiga o le ola amiotonu. E ao i fanau ona aoao ma tausia poloaiga a le Atua. E tatau ona latou ava ma usiusitai i o latou matua.

O le malosi o le Ekalesia e faalagolago lea i aiga ma tagata taitoatasi o e ola i le talalelei a Iesu Keriso. O le mamao e mafai ona olioli ai se aiga i faamanuiaga o le talalelei e faalagolago tele lea i le malamalama o le tama ma le tina ma le lelei la te faataunuuina ai o laua tiute faavae o ni matua. E le i faamoemoe lava le Ekalesia e tuuina mai ni polokalama po o ni tiutetauave i tama ma tina e faalofituina ai pe faalotovaivaiina ai i latou pe avea ma mafuaaga latou te tuulafoaia ai nei tiute faavae aupito taua.

## Faamoemoega

Talu ai ona e alofa lo tatou Tama Faalelagi ia i tatou, ua finagalo ai o Ia ina ia faaeaina i tatou e pei foi o Ia. Ina ia fesoasoani ia i tatou, ua Ia tuuina mai ai ia i tatou se fuafuaga e mulimuli ai e faavae lea i tulafono faalelagi o le upumoni. O i latou ua aoao e uiga i le fuafuaga ma mulimuli ai ma le faamaoni e i ai se aso e mafai ai ona avea e faapei o lo tatou Tama o i le Lagi ma olioli ai i le ituaiga soifuga o loo Ia soifua ai.

O se vaega o le fuafuaga e tatau ai ona tatou tuua le lagi ae o mai i le lalolagi. O iinei tatou te maua ai se tino faaletino, e aoao ai e ala i aafiaga

tatou te oo i ai, ma faamaonia ai lo tatou lava agavaa e toe nonofo ai i le afioaga o le Atua. E faamaonia lo tatou agavaa e ala i lo tatou saoloto e filifili e tausia Ana poloaiga. (Tagai Aperaamo 3:23–25; 2 Nifae 2:27.)

Ina ia fesoasoani e saunia i tatou lava mo le olaga faatasi ma Ia, ua faatula-gaina ai e lo tatou Tama Faalelagi i tatou i ni aiga. E mafai ona faatasia o tatou aiga e faavavau e ala i sauniga ma feagaiga paia.

# Aoaina Atu o le Talalelei i Totonu o le Aiga

---



## Aoaina o Fanau i le Agalelei ma le Alofa

Ua poloaiina matua e le Alii ina ia aoao atu le talalelei i a latou fanau. Na Ia fetalai mai:

“O lenei foi, afai e maua fanau e matua i Siona, po o se siteki ua faatulangaina, e le aoao atu ia te i latou ia malamalama le mataupu o le salamo, ma le faatuatua ia Keriso, le Atalii o le Atua soifua, ma le papatisoga ma le meaalofo o le Agaga Paia i le faaeaina o lima, pe a valu tausaga o lona matua, o le a pau lea agasala i matua.

“Aua o le a avea lenei mataupu ma tulafono i e nonofo i Siona, po o soo se tasi o ona siteki ua faatulagaina.

“O le a papatisoina foi a latou fanau mo le faamagaloina o a latou agasala pe a valu tausaga le matua, ma maua le faaeaga o lima.

“O le a latou aoao atu foi i a latou fanau ia tatalo, ma savavali tonu i luma o le Alii” (MFF 68:25–28).

E tatau i matua ona aoao atu i le agalelei ma le alofa, i le manatuaina o le fautuaga a le Aposetolo o Paulo ina ia “tausii atu i a [latou fanau] i aoaiga ma apoapoaiga a le Alii” (Efeso 6:4).

## Suesueina Faaleaiga o Tusetusiga Paia

E mafai ona avea i tatou e faapei o lo tatou Tama Faalelagi ma olioli i le itu-aiga soifuaga o loo Ia soifua ai i le na o

le tausia lea o tulafono e faavae ai lena faamanuiaga (tagai MFF 130:20–21). A o lei mafai ona tatou ola ai i na tulafono, e tatau ona tatou iloaina po o a ia tulafono. “E le mafai lava ona faaolaina le tagata i le valea” (MFF 131:6).

O Iesu Keriso o lo tatou taitai ma le faitulafono. Na te silafia le ala ma tulafono e tatau ona tatou tausia, ma ua Ia valaaulia i tatou taitoatasi e mulimuli atu ia te Ia. Na Ia fetalai mai, “O au nei le ala, ma le upumoni, ma le ola: e le alu atu lava se tasi i le Tama, pe a le ui mai ia te au” (Ioane 14:6). Ina ia avea e faapei o lo tatou Tama Faalelagi ma toe foi atu ia te Ia, e ao ona tatou aoao i aoaoga a Iesu ma mulimuli i ai. Ua ia te i tatou ia tusitusiga paia e fesoasoani tatou te aoao ai e uiga i le soifuaga, o aoaoga, ma poloaiga a Iesu Keriso.

O tusi e fa ua taliaina e le Ekalesia e avea o ni tusitusiga paia o le Tusi Paia, o le Tusi a Mamona, o le Mataupu Faavae ma Feagaiga, ma le Penina Tau Tele. Ua latou faamatala maia tulafono o le talalelei ma tulaga faatonuina e mafai ona tatou fua i ai mafaufauga uma, o mea e fai, ma aoaoga. Latou te fesoasoani ina ia tatou aoao e uiga i le soifuaga ma aoaoga a Iesu Keriso ma tuuina mai ai faataitaiga o tagata o e sa faatuatua i le Atua ma tausia Ana poloaiga.

Ua aoaoina i tatou e Iesu ina ia suesue ma aoao i tusitusiga paia (tagai Ioane 5:39; 3 Nifae 23:1; MFF 88:118).

E tatau i aiga ona suesue faatasi e le aunoa i tusitusiga paia ina ia aoao ma

mulimuli i aoaoga a le Alii. E tatau i matua ona faapotopoto faatasi o latou aiga i se taimi masani i aso taitasi e faitau ma talatalanoa i tusitusiga paia. E tatau i tagata taitoatasi o le aiga ua mafai ona faitautusi ona maua se avanoa e faitau ai mai tusitusiga paia.



E mafai e se tagata o le aiga ona faia se tatalo a o lei amataina le faitauga o tusitusiga paia, ma ole atu i le Tama Faalelagi ina ia faamanuia tagata taitoatasi ina ia malamalama i mea e faitauina ma ia maua se molimau e uiga i ai. Atonu foi e mananao aiga e fai la latou tatalo faaleaiga pe a uma le faitauga o tusitusiga paia.

A o faitauina e aiga tusitusiga paia ma mafaufau loloto i ai, o le a latou mananao e avea e faapei o le Faola ma o le a tele atu le fiafia ma le filemu latou te maua i o latou olaga.

## **Tatalo a Tagata Taitoatasi ma Tatalo Faaleaiga**

E ao ia i tatou taitoatasi ona aoao e talanoa atu i lo tatou Tama Faalelagi e ala i le tatalo. E alofa o Ia ia i tatou ma e finagalo tatou te talanoa atu ia te Ia. E finagalo o Ia ina ia tatou faafetai atu ia te Ia mo o tatou faamanuiaga, ma

ole atu mo Lana fesoasoani ma le taitaiga. O le a Ia fesoasoani mai ia i tatou pe a tatou ole atu. O le tele o tatalo e tuuina atu a o punonou o tatou ulu ma moeiini o tatou mata a o tatou tootutuli, nonofo, pe tutu foi.

E moomia ona tatou manatua ia mataupu faavae taua e fa pe a tatou tatalo:

1. E amata a tatou tatalo e ala i le tala-noa atu i lo tatou Tama o i le Lagi: “Lo Matou Tama e, o i le Lagi . . .”
2. Tatou te faafetai atu i lo tatou Tama o i le Lagi mo mea ua Ia aumaia mo i tatou: “Matou te faafetai atu i Lau Afio . . .”
3. Tatou te ole atu ia te Ia mo le fesoasoani tatou te manaomia: “Matou te ole atu i Lau Afio . . .”
4. E faauma a tatou tatalo i le suafa o le Faaola: “I le suafa o Iesu Keriso, amene.”

E le faapea o taimi uma e tatau ai ona mulimulitui a tatou tatalo i nei laasaga uma e fa, ae o le teuina pea i o tatou mafaufau, o le a fesoasoani lea tatou te iloa ai ona tatalo. E tatau ona tatou amataina ma faaiiina i taimi uma a tatou tatalo i le laasaga muamua ma le mulimuli, ae o mea tatou te ta’ua i le ogatotonu o le a faalagolago lea i mea tatou te lagona e taua. O nisi taimi o le a tatou mananao e faaalulu le tele o a tatou tatalo e faafetai ai i lo tatou Tama Faalelagi. O isi foi taimi atonu o le a tatou mananao e faaalulu le tele o a tatou tatalo e ole atu ai mo Lana fesoasoani.



### **Tatalo a Tagata Taitoatasi**

E tatau i tagata taitoatasi ona tatalo lava ia, ia le itiiti ifo i le faatasi i taeao ma afiafi taitasi. E tatau i matua ona aoao a latou fanau e fai a latou lava tatalo i le taimi lava e amata ai ona tautatala. E mafai e matua ona aoao fanau i le ala e tatalo ai e ala i le tootutuli faatasi ma i latou ma faaitaitai atu fuaiupu taitasi. E le pine ae mafai e le fanau ona fai a latou lava tatalo.

### **Tatalo Faaleaiga**

E tatau i aiga taitasi ona faia a latou tatalo faaleaiga i aso taitasi. E tootutuli faatasi le aiga atoa, ona fai lea e le ulu o le aiga le tatalo pe fai atu foi i se tagata o le aiga e faia. E tatau ona tofu tagata uma ma se avanoa e le aunoa e fai ai le tatalo. E mafai ona feauauai tamaiti laiti ae fesoasoani i ai o latou matua. O le tatalo faaleaiga o se taimi sili lea e aoao ai le fanau i le ala e tatalo ai ma le aoaoina atu o mataupu

faavae e pei o le faatuatua i le Atua, lotomaulalo, ma le alofa.



### Tatalo Faapitoa

E tatau i matua ona aoao atu ia latou fanau e faapea o loo saunia pea lava le Atua e faafofoga mai i a latou tatalo. E faaopoopo atu i a latou tatalo masani a le tagata lava ia ma tatalo faaleaiga, e mafai foi ona latou tatalo i soo se taimi latou te manaomia ai se fesoasoani faapitoa pe mananao ai foi e faaali atu le faafetai.

### Faamanuiaina o Meaai



E tatau i matua ona mautinoa ua aoao tagata o le aiga e faafetai i le Atua mo a latou meaai ma ole atu ia te Ia e faamanuia ae latou te le'i aai. O tagata taitoatasi, e aofia ai fanau laiti, e tatau ona auauai e faamanuia meaai. O le faia o se tatalo mo se faamanuiaga o meaai e fesoasoani ai i matua ma fanau e aoaoina le loto faafetai i lo tatou Tama Faalelagi.

### Afiafi Faaleaiga

O afiafi faaleaiga e mo tagata uma lava, e aofia ai ulugalii e le'i leva ona faaiipoipo, tama ma tina e i ai fanau, matua nofo toatasi e i ai fanau, matua e leai ni fanau i le fale, tagata matutua nofofua e fai faalevaega ia afiafi faaleaiga, ma i latou e nonofo toatasi po o nisi e potu faatasi. O tagata uma lava, e tusa lava pe o a o latou tulaga, o le a faamanuiaina i le faia o afiafi faaleaiga. Ua faavanoaina e le Ekalesia ia afiafi o Aso Gafua mai isi gaoioiga ina ia mafai ai ona faatasitasi aiga mo afiafi faaleaiga.



Ua saunua mai le Au Peresitene Sili: “Matou te folafola atu ia te outou faamanuiaga sili pe afai tou te mulimuli i

le apoapoaiga a le Alii ma faia a outou afiafi faaleaiga e le aunoa. Matou te tatalo e le aunoa ia talia e matua i le Ekalesia la latou matafaioi e aoao atu ma faataitai ia mataupu faavae o le talalelei i a latou fanau. Ia faamanuia outou e le Atua ina ia outou maelega i lenei matafaioi aupito taua" ("Savali mai le Au Peresitene Sili," *Tusi Faavae mo Afiafi Faaleaiga* [1983], iv).

I le avea ai ma peteriaka o lona aiga, e pulefaamalumu ai le tama i le afiafi faaleaiga. Afa e le i ai le tama, o le tina e pulefaamalumu. O matua e taitaia pe tofia se tasi o le aiga e taitai i le afiafi faaleaiga. La te aoaoina atu le lesona pe faamatuu atu foi le faia [o le lesona] i tamaiti ua lava le matutua e aoao atu ai. O tagata uma lava ua matutua e tatau ona i ai ni avanoa e auai i le faatinoina. E mafai e tamaiti laiti ona fesoasoani i le taitaiina o musika, taulotoina o mau, taliina o fesili, uuina o ata, tufatufaina o meaai mama, ma tatalo.

O se ototoga fautuaina lenei mo afiafi faaleaiga:

- Pese amata (saunia e le aiga)
- Tatalo amata (saunia e se tasi o le aiga)
- Faitauina o se solo po o se mau (saunia e se tasi o le aiga)
- Lesona (saunia e le tama, tina, po o se tamaitiiti matua)
- Gaoioiga (taitaia e se tagata o le aiga ma ia auai tagata uma o le aiga)
- Pese faaiu (saunia e le aiga)

- Tatalo faaiu (saunia e se tasi o le aiga)
- Meaai mama

E tele isi auala e mafai ai e se aiga ona faia afiafi faaleaiga. Soo se gaoioiga lava e tuufaatasia ai le aiga, fefaamalosia ai le alofa o le tasi i le isi, fesoasoani latou te latalata atili atu ai i le Tama Faalelagi, ma faamalosiaina ai i latou ina ia ola amiotonu, e mafai ona avea o se afiafi faaleaiga. O faataitai o ia ituaiga gaoioiga e aofia ai le faitauina o tusitusiga paia, talanoaina o le talalelei, fetufoaia ia molimau, faia o se galuega auaua atu, usuusu pese faatasi, o i se tafaoga, taaalo i se taaloga faaleaiga, ma savaliga sopo. O afiafi faaleaiga uma lava e tatau ona aofia ai ma se tatalo.

O lesona o afiafi faaleaiga e mafai ona faavae i tusitusiga paia; o saunoaga a perofeta o aso e gata ai, aemaise lava o lauga o konafesi aoao; o aafiaga faaletagata ma molimau. E tele lesona e tatau ona taulai atu i le fanau mai, soifuaga, aoaoga ma le Togiola a le Faaola. O *Mataupu Faavae o le Talalelei*, *Mataupu Autu o le Talalelei*, *Faamaoni i le Faatuatua*, *Mo Le Malosi o le Autalavou*, ma mekasini a le Ekalesia o loo i ai tala ma isi faamatalaga i le tele o mataupu ia e mafai ona avea ma se vaega o lesona o afiafi faaleaiga.

O autu fautuaina nei e talanoaina i afiafi faaleaiga:

- O le ata o le faaolataga
- O le soifuaga ma aoaoga a Iesu
- Salamo



- Tatalo
- Anapogi
- O le Upu o le Poto
- O tulaga faatonuina a le Alii o amioga mama
- O le uiga o le faamanatuga
- Sefuluai
- Loto faafetai
- Faamaoni
- Migao mo le Atua ma le faaaloalo i Ana foafoaga
- Saunia mo le papatisoga, faauuga i le perisitua, po o le faaipopoga
- Saunia e ulu atu i le malumalu
- Faitauina o tusitusiga paia
- Tausia le paia o le aso Sapati
- Faamagalo atu i isi
- Mauaina ma le fetufaai atu o se molimau
- Fetufaai atu o le talalelei i isi
- Tuufaatasia o talafaasolopito o aiga
- Malamalama ma le taliaina o le oti
- Foiaina o faafitauli faaleaiga
- Puleaina o tupe a le aiga
- Fefaasoaa'i o galuega faaleaiga
- Talisapaiaina ma le fiafia i musika

## **Aso Malolo ma Faatasiga Faapitoa**

O aso malolo ma faatasiga faapitoa, e pei o le Kerisimasi; Eseta; ma le

faamanatuina o le toefuataiga mai o le perisitua; konafesi; malaga ese atu o se tagata o le aiga mo se misiona; po o le fanau mai, papatisoga, po o le faauuga o se tagata o le aiga, e mafai ona avea ma avanoa silisili e aoao atu ai upumoni o le talalelei.

## **Sefuluai ma Taulaga**



Na poloa'ina e le Alii Lona nuu ina ia ola i le tulafono o le sefuluai ma ia agavaa mo faamanuiaga ua folafola'ina mai (tagai Malaki 3:8–11).

O se taimi aupito sili mo matua e aoao atu ai le tulafono o le sefuluai ma taulaga o le taimi lea e totogi ai a latou lava [sefuluai ma taulaga]. E tosina atu tamaiti i mea latou te vaai i ai o fai e o latou matua. O tamaiti o e mauaina ni alauni, e tatau ona latou totogia ai le sefuluai. E mafai ona tofu tamaiti taitoatasi ma ni koneteina eseese mo tupe: tasi mo le sefuluai, tasi mo le misiona, ma le tasi mo ana tupe faaalu. O taimi taitasi e maua ai e tamaiti se tupe, e tatau ona latou aoao e tuu ese muamua le 10 pasene i totonu o le koneteina o le sefuluai, ona tuu lea o sina vaega i le

koneteina o le misiona, ae tuu le tupe e totoe i le konetaina o tupe faaalu.

Afai e totoi e tamaiti a latou sefuluai, e tatau i matua ona aoao i latou i le faatumuina o se pepa mo sefuluai, tuu i totonu o se teutusi faatasi ma le tupe, ona tuu atu lea pe auina atu le teutusi i se tasi o le au epikopo po o le au peresitene o le paranesi. O aiga e nonofo i se eria e motu mamao ese, e tatau ona ave a latou sefuluai i lo latou taitai perisitua ua tofia.

## Talanoaga i Taimi o Meaai

O taimi o taumafataga e mafai ona ave ma taimi lelei e talatalanoa ai e uiga i le talalelei. E fiafia tamaiti laiti e fesili ma tali foi i fesili o le talalelei. Afai latou te le iloaina ia tali, e mafai e le tama po o le tina ona tuu atu ni tali e pupuu ma aoao atu i ai le talalelei. E le faapea foi o taimi uma o taumafataga e aofia ai se talanoaga faaletalalelei, ae o ia ituaiga talanoaga pe tai faalua pe faatolu i le vaiaso, e mafai ona fesoasoani i le aiga e aoao ai le talalelei.

## Tala i Taimi o le a Momoe Ai

Talu ai o le toatele o tamaiti e fiafia i tala i le taimi e momoe ai, o iina foi e maua ai se avanoa silisili mo le aoaoina atu o le talalelei e ala i le faamatalaina pe faitauina foi tala mai tusitusiga paia, lomiga a le Ekalesia, po o aafiaga faaletagata. O tala e faatatau i le faamaoni, fetufaai, ma le agalelei e aoao atu ai mataupu faavae taua o le talalelei.

## Galulue Faatasi



E tele avanoa e tulai mai e aoao atu ai le talalelei pe a galulue faatasi aiga i le fale. A o faamamaina le fale pe galulue foi i le teuina o le fanua po o le togalaau, mo se faaitaiga, e tatau i matua ona mataalia mo avanoa e talanoa atu ai e uiga i le talalelei. E masani ona fesili soo se tamaitiiti. E tatau i matua ona faaavanoa taimi uma e tuuina atu ai ni tali faigofie. O faamatalaga e pei o le “O oe o se tagata galue lelei. Ou te mautinoa ua mitamita lava le Tama Faalelagi ia te oe” po o le “Vaai i ao matagofie o le lagi na faia e le Tama Faalelagi” e mafai ona maua ai e tamaiti se lagona o le loto faafetai i lo tatou Tama Faalelagi ma se faamautinoaga e moni lava o Ia.

## Aufono Faaleaiga

E mafai e matua ona faapotopoto faatasi tagata o le latou aiga i se aufono faaleaiga. E mafai e aiga ona faaoga nei fonotaga e faatutu ai sini faaleaiga, foia ai faafitauli faaleaiga, talanoaina ai mea tau tupe, faia ai fuafuaga, lagona ma fefaamalosia i le tasi i le isi, tuuina atu molimau, ma tatalo le tasi



mo le isi. E mafai ona faia se fonu i soo se taimi e manaomia ai. Atonu e mananao matua e faia se fonotaga faaleaiga i Aso Sa taitasi, pe fai faatasi foi ma le afiafi faaleaiga. O le faaloalo i manatu ma lagona o isi e taua lea mo le manuia o fonotaga faaleaiga.

## Faatalanoaga Patino

E toatele matua ua latou iloaina o faatalanoaga masani ma le patino ma tamaiti taitoatasi o le fanau, ua fesoa-soani ia latou vavalalata ai ma a latou fanau, faamalosi atu ia i latou, ma aoao i latou i le talalelei. O ia faatalanoaga e mafai ona fai i se tulaga aloaia pe faasamasamanoa foi ma e mafai ona faifai soo.



E tatau i le matua ona faalia le alofa ma le lagona mautinoa i le tamaitiiti, ma e tatau i le tamaitiiti ona maua se avanoa e faaali atu ai ona lagona e uiga i soo se mataupu, faafitauli, po o se mea na oo i ai. E tatau i le matua ona faalogo atu ma le faaeteete ma e tatau foi ona taulimaina ma le loto atoa faafitauli o le tamaitiiti ma ia le faalauaitelaina. Atonu e mananao le matua ma le tamaitiiti e tatalo faatasi. O faafitauli e tulai mai i faatalanoaga e aafia ai isi tagata o le aiga e mafai ona taulimaina i le isi afiafi faaleaiga.

## Gaoioiga Faaleaiga

E tatau i matua ona fuafua soo ni taimi e faatasia atoa ai le aiga e fai ni gaoioiga. O tafaoga, tolauapiga, galuega faaleaiga, galuega i le fale ma le fanua, feausiga, savaliga sopo, ma tifaga lelei ma isi faafiafiaga o nisi ia o le mau gaoioiga e mafai ona fafia faatasi ai le aiga.

O se aiga e fafia faatasi i gaoioiga o le a lagonaina foi se alofa sili atu ma le lotogatasi. O le a sili atu ona naunau tamaiti e faalogo i o latou matua ma mulimuli i a la fautuaga pe a latou lagonaina le latalata atu ia i laua. O le a mafai foi e matua ona lelei le aoaoina atu i ai o le talalelei.



# Faataunuuina o Tiutetauave Faaleaiga

---



O le misiona a le Ekalesia a le Alii o le fesoasoani lea i tagata uma ia o mai ia Keriso. E mafai e aiga ona fesoasoani e faataunuu lenei misiona a o latou:

1. Saunia o latou lava manaoga faaleagaga ma faaletino ma fesoasoani atu ia ausia manaoga o isi.
2. Fetufaai atu i isi le talalelei.
3. Vaai ia maua e tagata o le aiga sauniga o le malumalu ma fesoasoani e tuuina atu nei faamanuiaga mo o latou tuua ua maliliu.

## **Manaoga Faaleagaga ma le Faaletino**

### **Manaoga Faaleagaga**

O le vaega na faatoa mavae atu nei o lenei tusitaiala, "Aoaoina Atu o le Talalelei i Totonu o le Aiga," o loo aofia ai faamatalaga i auala e mafai ai e aiga ona saunia mo o latou manaoga faaleagaga.

### **Manaoga Faaletino**

E ao i aiga ona faalagolago ia i latou lava ina ia mafai ai ona latou saunia mo o latou lava manaoga faaletino ma fesoasoani ai i isi. Ina ia avea ma ni tagata e faalagolago ia i latou lava, e tataua i tagata o le aiga ona naunau e galulue. O le galue o ni taumafaiga

e faaletino, faalemafaufau, pe faaleagaga foi. O se puna o mea e faatau-nuuina, fiafia, manatu lelei ia te oe lava, ma le uluuluola. E tatau i matua ona tauivi ina ia faalagolago ia i latou lava ma e tatau ona aoao a latou fanau ina ia faapena foi. O le faalagolago o le tagata ia te ia lava o le a mafai ai ona latou fesoasoani i e manaomia le fesoasoani.

O tama e nafa ma le sauniaina o mea e manaomia i le olaga ma le puipuiga mo o latou aiga. O tina e muamua lava nafa ma le faafaileleina o a latou fanau. E tatau i matua ona tagai ua i ai se fale mama o le aiga, o meaai lelei, o lavalava, tausiga o nifo ma le soifua maloloina, avanoa e aooga ai, aoaoga mo le puleaina o mea tau tupe, ma, afai e mafai, ia aoao pe faapefea ona totoina nisi o a latou meaai. E tatau i matua ona aoao a latou fanau pe faapefea ona saunia a latou meaai ma pe faapefea ona teu mo le faaaogaina i se taimi mulimuli ane.

E tatau i matua ona naunau e galulue malosi e saunia nei manaoga faaletino. "Tou te le tuu atu ia outou fanau ia latou fia aai, pe le lavalava" (Mosaea 4:14). E tatau i matua ona fuafua ma sauniuni e tali atu i manaoga o aiga i taimi e mama'i ai, o mala matautia, leai o ni galuega, po o isi mea faigata. Afai ua faaletonu le tama ma ua le mafai ona saunia manaoga faaletino mo lona aiga ma afai foi e le mafai e isi tagata o le aiga ona fesoasoani atu, e mafai ona ia saili atu se fesoasoani e auala atu i taitai o le perisitua.

E mafai e tamaiti ona fesoasoani i le sauniaina o manaoga faaletino o o latou aiga e ala lea i lo latou fesoasoani atu i o latou matua ia latou galuega, ia toaaga i aoga, ia tausia lelei o latou lavalava ma isi meatotino, ia faamama i latou lava ma o latou fale, ma ia tausisia le soifua maloloina lelei.

E tatau i tagata o le aiga ona faaleleia atili lo latou tomai e faitautusi, tusi-tusi, ma fai numera faigofie, ma e tatau foi ona faaoga lelei avanoa uma e maua ai le malamalama ma faaleleia atili ai tomai. E tatau ona latou usiusitai i le Upu o le Poto ma aai i meaai maloloina. O nofoaga e mafai ai, e tatau i le aiga ona teuina se sapalai mo le tausaga, po o le tele foi e mafai ai, o meaai masani e manaomia e tausi ai le ola. E tatau i tagata o le aiga ona aloese mai le aitalafu e le tatau ai, ia faaputupu tu mo le lumanai, ia taulima a latou matafaioi uma, ma faaoga ma le faautauta a latou risosi ma aua le faataugaina.

E tatau i matua ona aoao a latou fanau ina ia fetufaai ma isi. E toetoe lava o tagata uma e mafai ona tuuina atu sina mea, tusa lava pe o le a le itiiti o mea latou te maua. O se tasi auala e fesoasoani ai ia i latou e manaomia le fesoasoani, o le anapogi lea i masina taitasi ma foai atu ia taulaga anapogi, ia o loo faaaogaina e fafaga ai i latou o e fia aai, o fale e nonofo ai i latou ua leai ni mea e nonofo ai, faaofu i e ua le lavalava, ma faamama avega i e ua mafatia. E faaalua lo tatou alolofa i le Alii pe a tatou fesoasoani atu i isi. Na

Ia fetalai mai, “Aua na faia e outou i le tasi o e aupito iitii o ou uso nei, o au lea na outou faia i ai” (Mataio 25:40).

## Fetufaai atu o le Talalelei



Ua aoao mai e le Alii e ala mai i Ana perofeta o aso e gata ai e faapea, ua i ai i tagata uma o le Ekalesia le tiute-tauave e fetufaai atu ai le talalelei i isi. “E tatau foi i tagata uma ua uma ona lapataiina ona lapatai i lona tuaoi” (MFF 88:81). O Alema, o se perofeta i le Tusi a Mamona, sa ia faamatalaina e faapea, pe afai e papatisoina i tatou e tatau ona tatou naunau e “laulaututu e fai ma molimau a le Atua i aso uma, ma mea uma, atoa ma nuu uma” (Mosaea 18:9).

E tatau i tagata o le aiga ona faia mea uma latou te mafaia e fesoasoani ai i tagata o o latou aiga, o uo, ma tuaoi ia aoao e uiga i le talalelei a Iesu Keriso ma faamanuiaga e mafai ona ia aumaia i o latou olaga. O le fetufaai atu o le talalelei, e mafai ai e matua ma fanau ona faamalolosi a latou lava molimau ma avatu ai faamanuiaga o le talalelei i isi. E mafai e aiga ona:

- Avea ma faataitaiga lelei e ala i le ususitai i poloaiga uma (tagai Mataio 5:16).
- Faafetai mo lo latou auai i le Ekalesia (tagai Roma 1:16) ma faailoa atu i isi tagata o i latou o tagata lotu.
- Fesili i e latou te masani pe latou te fia iloa atili e uiga i le Ekalesia.
- Ole atu i le Alii ina ia fesoasoani ia i latou e filifili se aiga po o se tagata e toatasi ua saunia e faalogo i le talalelei.
- Faailoa atu le aiga po o le tagata i le Ekalesia i soo se auala, e pei o le valaauliaina o i latou i se afiafi faaleaiga po o se sauniga po o se gaio-oiga a le Ekalesia, avatu i ai tusi a le Ekalesia po o tamaitusi e faitau ai, pe talanoa foi ma i latou e uiga i faamanuiaga o le talalelei.
- Valaaulia le aiga po o le tagata i lo latou fale ina ia aoao ai e faifeautalai.

Ua i ai i matua le tiute-tauave o le saunia o i latou lava faapea foi a latou fanau e auaua atu i ni misiona talai. Ina ia saunia le fanau, aemaise lava o atalii, e tatau i matua ona aoao atu le talalelei i totonu o le aiga, ia suesueina tusitusiga paia ma faia tatalo faaletagata lava ia faapea foi ma le aiga atoa, ma talatalanoa soo e uiga i tiute-tauave ma faamanuiaga o le faasoaina atu o le talalelei. E mafai ona latou aoao a latou fanau e faaputupu-tupe mo misiona, ia galulue malosi, ia faalagolago le tagata ia te ia lava, ma alolofa ma auaua atu i isi tagata.

## Sauniga o le Malumalu mo e Ola ma e Oti



I totonu o malumalu, e maua ai e tagata agavaa o le Ekalesia o latou sauniga paia ma osifeagaiga ai ma le Atua. Latou te auai foi i galuega o sauniga mo o latou tuaa ua maliliu. O nofoaga e mafai ai, e tatau i le tama ma le tina ona tofu maua se pepa faataga o le malumalu mai o latou taitai perisitua ma o atu i se malumalu mo le mauaina o o laua lava sauniga o le malumalu. Afai e le mafai ona o i se malumalu, e tatau ona ola agavaa i laua mo se pepa faataga o le malumalu.

Ua i ai i aiga le tiutetauave paia ia mautinoa ai ua faia sauniga o le malumalu mo o latou tuaa ua maliliu ae lei mauaina ia sauniga. O tagata o le Ekalesia ua mauaina o latou lava sauniga e tatau ona toe foi soo atu i le malumalu pe a tusa ai ma le taimi, o auala, ma avanoa e maua i le malumalu, e faataunuunuina ai sauniga mo o latou tuaa.

E tatau i tama ma tina ona ao mai faamauga o mea taua na tutupu i o latou olaga ma olaga o a latou fanau, e aofia ai tusi faamaonia o faamanuiaga, papatisoga, faauuga, faaipoipoga, ma maliu; o tusi taua; ata pue; o tala fou na otioti mai nusipepa; ma isi mea faapena. E tatau ona latou tuufaatasia o latou lava talafaasolopito faaletagata ma faamalosiaina tagata taitoatasi o le aiga e tausia sana lava talafaasolopito. E tatau ona latou fesoasoani i fanau laiti e amata ona tausia a latou lava talafaasolopito faaletagata.

E tatau i aiga ona ao mai faamatalaga e uiga i o latou tuaa ma tuufaatasi i ni talafaasolopito faaleaiga. E tatau ona latou amata i le tuufaatasia o faamatalaga o o latou augatupulaga e fa e aupito lata mai.



# Aoaoga Faaleautaitai

---



I lalo o le taitaiga a taitai o le siteki, misiona, po o le itu, e tatau i taitai perisitua ma ausilali ona aoaoina ia matua ina ia malamalama ma faatau-nuu tiute faavae faaleaiga e tolu (tagai itulau 14–17). E tatau i taitai ona aoaotina ma tama i le auala e taitai ai o latou aiga. Afai e motu mamao ese se eria e nonofo ai le aiga, e ao i taitai o le siteki, misiona po o le itu ona tagai ua aoaoina ia matua ma faatau-nuu o latou tiutetauave.

# Faia o Sauniga Tapuai i le Fale (Mo Aiga i Eria e Motu Mamao Ese)

---



O nisi aiga e motu mamao ese eria e nonofo ai ma e le mafai ona auai soo atu i sauniga a uarota po o paranesi. *Faatasi ai ma le faatagaga mai le peresitene o le siteki, misiona po o le itu, e tatau i aiga faapena ona faia sauniga lotu o le Aso Sa i o latou fale. I eria e le i faatuina ai ni iunite a le Ekalesia, e manaomia e aiga le faatagaga a le Peresitene o le Eria.*

E mafai e le tama po o se isi e umia le perisitua ona saunia ma faamanuia le faamanatuga pe afai e agavaa o ia, o se ositaulaga i le Perisitua Arona pe umia foi le Perisitua Mekisateko, *ma ua maua le faatagaga mai ona taitai perisitua.* Soo se tasi e umia le perisitua e mafai ona tufatufaina le faamanatuga. O faatonuga mo le taulimaina o le

faamanatuga o loo maua i le itulau e 24–26 o lenei tusitaiala.

O se sauniga tapuai i le Aso Sa e tatau ona faigofie, mamalu, ma paia. E mafai ona aofia ai le:

1. Viiga amata
2. Tatalo amata
3. Faamanuiaina ma le tufatufaina o le faamanatuga
4. Se vaega se tasi pe sili atu foi o mea nei:
  - Tasi pe lua ni lauga pupuu po o ni molimau
  - Faitau tusitusiga paia ma talanoaina o se aiga
  - Se lesona e faia e se tagata o le aiga

5. Viiga faaiu

6. Tatalo faaiu

I le fuafuaina o se sauniga lotu i le Aso Sa, e tatau i matua ona saili ma mulimuli i le taitaiga a le Agaga o le Alii. Na tuuina mai e tagata o le Tusi a Mamona se faaitaiga o lenei ituaiga sauniga: “Ua faia foi a latou lotu . . . e tusa ma le galuega a le Agaga ma le mana o le Agaga Paia; aua e pei ona taitaiina i latou e le mana o le Agaga Paia e lauga atu, pe apoapoai atu, pe tatalo, pe aioi atu, pe pese, ua faapea lava ona faia” (Moronae 6:9).

E tatau i le aiga ona faaoga tusitusiga paia e fai ma o latou taiala faavae. E faaopoopo atu i ai, e mafai foi ona latou faaogaina lauga o konafesi aoao, o *Mataupu Autu o le Talalelei*, *Mataupu Faavae o le Talalelei*, *Faamaoni i le Faatuatua*, *Mo Le Malosi o le Autalavou*, o tamaitusi a faifeautalai, mekasini a le Ekalesia, ma isi lomiga a le Ekalesia ma kaseti faalologo.

Afai e leai se tasi o le aiga e umia le perisitua talafeagai, e mafai e le tama po o le tina ona faapotopoto faatasi tagata o le aiga e lagiina viiga, suesue i tusitusiga paia, tatalo, ma faalatalata atili atu i le Tama Faalelagi. O le taitai perisitua ua tofia i le aiga na te faatulagaina ni avanoa faifaisoo mo le aiga e maua ai le faamanatuga.

E tatau i matua ona fai ni gaoioiga i aso o le vaiaso, e pei o savaliga sopo, tafaoga, tifaga lelei, asiiasi i aiga, taaloga, ma polokalama faamusika ma feausiga.

E tatau i le aiga ona tuuina atu sefuluai, taulaga anapogi, ma isi foai i lo latou taitai perisitua ua tofia atu i lo latou aiga.

E leai ni lipoti e tuuina atu e le aiga i le Ekalesia, ae o lo latou taitai perisitua ua tofia atu na te faatalanoaina e le aunoa le tama, ma talosagaina o ia e lipoti atu le tulaga o loo i ai le aiga. I tulaga e talafeagai ai, e mafai e taitai ona faia nei faatalanoaga i le telefoni.

# Sauniga ma Faamanuiaga o le Perisitua

---



O sauniga o le perisitua o ni galuega paia ia na tuuina mai e le Alii ma e faataunuuina i le pule o le perisitua. O faamanuiaga faaleperisitua e tuuina atu i le pule o le perisitua mo faamalogoga, faamafanafanaga, ma faamalosi-auga. O uso latou te faataunuuina ia sauniga ma faamanuiaga, e tatau ona saunia i latou lava e ala lea i le ola ai e tusa ma mataupu faavae o le talalelei ma taumafai ina ia taialaina e le Agaga Paia. E tatau ona latou faia sauniga ma faamanuiaga taitasi i se tulaga mamalu ma ia ogatasi ma tulaga manaomia o loo taua i lalo; o le sauniga e tatau ona:

1. Faia i le suafa o Iesu Keriso.
2. Faia i le pule o le perisitua.

3. Faia i soo se faasologa e tatau ai, e pei o le faaaogaina o upu patino po o le faaaogaina o le suauu ua faapaiaina.

4. Faamaonia pe faatagaina e le taitai perisitua o loo umia ki sao, pe afai e tatau ai.

*O sauniga e manaomia ai le faatagaga a le taitai perisitua o le faaigoaina ma le faamanuiaina o fanau, faia o papatisoga ma faamauga, faaeina atu o le perisitua ma le faauuina i se tofi o le perisitua, faamanuiaina ma le tufatufaina atu o le faamanatuga, ma le faapaiaina o tuugamau.*

Afai e toatele nisi o uso e auai i se sauniga po o se faamanuiaga, e tuu faamama e i latou taitoatasi lona lima

tauagavale i luga o le tauau o le uso o loo i lona itu agavale. Ua le toe fautuaina le faiga lea o le valaaulia o ni uso se toatele e umia le perisitua e lagolago atu.

O sauniga ma faamanuiaga o loo faalamalamaina i lenei vaega o le a fesoasoani i tama i le avea ai ma peteriaka i o latou aiga.

## Faaigoaina ma le Faamanuiaina o Fanau



“O le au paia uma lava o le ekalesia a Keriso o i ai fanau e ao ina aumaia i latou i luma o le ekalesia i toaina, o le a faaee o latou lima i luga ia te i latou i le suafa o Iesu Keriso, ma faamanuiaina i latou i lona suafa” (MFF 20:70). Ina ia tusa ai ma lenei faaaliga, e na o alii agavaa o loo umia le Perisitua Mekisateko e mafai ona auai i le faatinoina o le faaigoaina ma le faamanuiaina o fanau. O le sauniga o le faaigoaina ma le faamanuiaina o fanau, e manaomia ai le faatagaga mai le taitai pulefaamalumalu.

Afai e faamanuia se pepe, e tutu faataliolio ia alii o loo umia le Perisitua Mekisateko ma sii le pepe i o latou lima. Afai e faamanuia se tamaitiiti ua matua, ona tuu faamama lea o lima o uso i luga o le ulu o le tamaitiiti. O le tagata na te tuuina atu le faamanuiaga e:

1. Tau le Tama Faalelagi.
2. Tau atu faapea o le faamanuiaga o loo tuuina atu i le pule o le Perisitua Mekisateko.
3. Tuu atu i le tamaitiiti se igoa.
4. Tuuina atu se faamanuiaga faaleperisitua e pei ona taitaiina ai e le Agaga.
5. Faaiu i le suafa o Iesu Keriso.

## Papatisoga



*I lalo o le taitaiga a le taitai pulefaamalumalu, e mafai e se ositaulaga po o se alii agavaa e umia le Perisitua Mekisateko ona faia se papatisoga. Ina ia faia faapea, o ia e:*

1. Tutu faatasi ma le tagata o le a papatiso i totonu o le vai.

2. Mo le faafaigofieina ma le saogalemu, na te uuina i lona lima agavale le tapulima taumatau o le tagata; o le tagata e papatiso na te uuina i lona lima agavale le tapulima tauagavale o le tagata e faia le papatisoga.
3. Sii i luga lona lima taumatau i le sikuea.
4. Tau le igoa atoa o le tagata ma fai atu, "Ona ua tofia au e Iesu Keriso, ou te papatiso ia te oe i le suafa o le Tama, ma le Alo, ma le Agaga Paia. Amene" (MFF 20:73).
5. Uu e le tagata i lona lima taumatau lona isu mo le faafaigofieina; o le tagata e faia le papatisoga na te tuu lona lima taumatau ia faamaualuga i le tua o le tagata ma faatofu atoa le tagata i le vai, ia aofia ai ma lavalava uma o le tagata.
6. Fesoasoani i le toe aumaia i luga o le tagata mai le vai.

E toalua ni ositaulaga po o ni alii e umia le Perisitua Mekisateko e moli-mauina ia papatisoga taitasi ina ia mautinoa o loo sao ona faia. E tatau ona toe fai le papatisoga pe afai e le o sao ona tau upu e pei ona tuuina mai i le Mataupu Faavae ma Feagaiga 20:73 pe sa i ai foi se vaega o le tino o le tagata po o ona lavalava e lei lilofia atoa i le vai. O le tagata e papatisoina ma le tagata e faia le papatisoga, e tatau ona fai ni o laua ofu papae e le valavala pe a susu.

## Faamauga



O tagata liliu mai ua tai iva tausaga pe sili atu foi ma i latou e tai valu tausaga ae le lolotu uma matua, e fai le faamauga i se sauniga faamanatuga (tagai MFF 20:41). O tamaiti ua tai valu tausaga e mafai ona faia loa lava le faamauga pe a maea le papatisoga i le mea o faia ai le papatisoga pe afai e auai se tasi o matua i le Ekalesia, ma ua taufai tuuina mai foi e matua le faatagaga mo le papatisoga ma le faamauga. *I lalo o le taitaiga a le epikopo po o le peresitene o le paranesi*, e mafai ai e se alii e toatasi po o le sili atu foi o loo umia le Perisitua Mekisateko ona faia lenei sauniga. Latou te tuu faamama o latou lima i luga o le ulu o le tagata. O le tagata e faia le sauniga na te:

1. Tau le igoa atoa o le tagata.
2. Tau atu faapea o le sauniga o loo faia i le pule o le Perisitua Mekisateko.

3. Faamauina le tagata o se tasi O Le Ekalesia a Iesu Keriso o le Au Paia o Aso e Gata Ai.
4. Tuuina atu le meaalofo o le Agaga Paia i le faapea atu, “Talia le Agaga Paia.”
5. Tuuina atu se faamanuiaga faaleperisitua e pei ona taitaiina ai e le Agaga.
6. Faaiu i le suafa o Iesu Keriso.

## Faaeeina atu o le Perisitua ma le Faauuina i Tofi o le Perisitua



*O le epikopo po o le peresitene o le paranesi e puleaina le faaeeina atu o le Perisitua Arona ma le faauuina i tofi o le tiakono, aoao, ma le ositaulaga. A o lei faauuina se tagata i se tofi o le Perisitua Arona, e tatau ona faatalanoaina o ia e le epikopo po o le peresitene o le paranesi ma iloa ai ua agavaa. E le gata i lea, e tatau ona lagolagoina o ia i se sauniga faamanatuga. O le pule po o le faatagaga a le epikopo po o le peresitene o le paranesi, e mafai ai ona faaee atu e se ositaulaga le Perisitua Arona i luga*

o se isi tagata ma faauu o ia i se tofi o le Perisitua Arona.

*O le peresitene o le siteki po o le misiona na te puleaina le faaeeina atu o le Perisitua Mekisateko ma le faauuina i le tofi o le toeaia ma le faitaulaga sili.*

Ina ia faaee atu le perisitua pe faauuina foi se tagata i se tofi o le perisitua, e toatasi pe sili atu foi ni alii o loo umia le perisitua e tatau ai, ma ua faatagaina e le o loo pulefaamalumu ma latou te tuu faamama o latou lima i luga o le ulu o le tagata. O le tagata o loo faia le sauniga na te:

1. Tau le igoa atoa o le tagata.
2. Tau le pule (Perisitua Arona po o le Mekisateko) o loo faataunuuna ai le sauniga.
3. Faaee atu le Perisitua Arona po o le Perisitua Mekisateko, sei vagana ua uma ona faaeeina atu muamua.
4. Faauu le tagata i se tofi i le Perisitua Arona po o le Perisitua Mekisateko, ma tuuina atu aia tatau, mana, ma le pule o lena tofi.
5. Tuu atu se faamanuiaga faaleperisitua e pei ona taitaiina ai e le Agaga.
6. Faaiu i le suafa o Iesu Keriso.

## Faamanatuga

O le faamanatuga o se sauniga paia tele. O le taumafa i le faamanatuga e maua ai le avanoa e manatua ai le soifuuga, aoaoga, ma le Togiola a Iesu Keriso. O se taimi lea e toe faafou ai feagaiga na osia ma le Alii i le taimi o le papatisoga (tagai Mosaea 18:8–10).



E mafai e aoao ma ositaulaga ona saunia le faamanatuga; e mafai ona faamanuia e ositaulaga, ma e mafai ona tufatufa e tiakono, aoao, ma ositaulaga. O uso o loo umia le Perisitua Mekisateko e mafai foi ona latou sauniaina, faamanuia, ma tufatufa le faamanatuga, ae o le mea masani, latou te faatoa faia pe afai e le lava ni uso o le Perisitua Arona o i ai. Afai na faia se solitulafono matuia e se tagata, e le tatau ona ia saunia, faamanuia, pe tufatufaina foi le faamanatuga sei vagana ua salamo ma foia faatasi ma lana epikopo po o le peresitene o le paranesi lea mataupu.

O i latou o e sauniaina, faamanuia, pe tufatufaina foi le faamanatuga, e fai i latou ma sui o le Alii e taitaiina ai lenei sauniga mo isi. O i latou taitoatasi o loo umia le perisitua e tatau ona faia lenei galuega ma se uiga mamalu, ma le faaaloalo. E tatau ona teuteu lelei, ia mama, ma fai faalelei ona laei. O ona foliga vaaia e tatau ona atagia mai ai le paia o le sauniga.

O uso o e sauniaina le faamanatuga e tatau ona faia a o lei amataina le sauniga. Latou te tuu ia falaoa e lei tofitofia i luga o se fata mama mo le areto

ma tuu foi fata o ipu faamanatuga ua i ai vai i luga o le laulau faamanatuga. Latou te ufiufia le areto ma le vai i se ie paepae mama.

I le taimi o le viiga faamanatuga, o i latou o loo i le laulau faamanatuga e aveeseina le ie mai fata o le areto, ma tofitofia faalaiti le areto. A maea le viiga, o le tagata e faamanuiaina le areto e tootuli ma fai le tatalo o le faamanatuga mo le areto. Ona tufatufa atu lea e uso le areto ia i latou o loo auai i se faiga faaaloalo ma le faatulagaina lelei. O le taitai o loo pulefaamalumu i le sauniga e muamua taumafa i le faamanatuga. Afai ua tofu maua e tagata uma o loo auai se avanoa e taumafa ai i le areto ona toe faafoi atu lea e i latou o loo tufaina a latou fata i le laulau faamanatuga. Ona toe ufiufi lea o fata e i latou o loo faamanuiaina le faamanatuga i le taimi lava e maea ai ona tufa le areto.

Ona aveese lea e i latou o loo i le laulau faamanatuga le ie o loo ufi ai fata vai. E tootuli le tagata o loo faamanuiaina le vai ma tuuina atu le tatalo o le faamanatuga mo le vai. Ona tufa atu foi lea e uso ia le vai mo i latou o loo auai. Ona toe faafoi lea o fata i le laulau faamanatuga ma toe ufiufi. Ona malaga atu ai lea o uso sa faamanuiaina ma tufatufa le faamanatuga e nonofo faatasi ma le faapotopotoga.

O le faamanatuga e mo tagata o le Ekalesia, e aofia ai ma tamaiti. E le tatau i le tagata o loo taitaia le sauniga ona folafola atu faapea o le ana o tagata o le ekalesia e tufa i ai



le faamanatuga; e le tatau lava ona faia se mea e taofia ai tagata le lolotu mai le taumamafa ai.

O tatalo o le faamanatuga e tatau ona manino le faaleoga, ia sao lelei, ma ia faia ma le mamalu. Afai e i ai se mea e sese i le faaupuga a le tagata o loo faamanuiaina le faamanatuga, ae na te le faasaoina e ia lava, ona faatonuina lea o ia e le epikopo po o le perisitene o le paranesi e toe fai le tatalo ma fai faasao.

O le tatalo lenei o le areto:

“Le Atua e, le Tama Faavavau, matou te faatoga atu ia te oe i le suafa o lou Alo, o Iesu Keriso, ia e faamanuiaina ma faapaiaina lenei areto i agaga o i latou uma o e fetagofi i ai, ina ia latou taumamafa i le faamanatuina o le tino o lou Alo, ma molimau atu ia te oe, le Atua e, le Tama Faavavau, latou te lotoina ave i o latou luga le suafa o lou Alo, ma manatua pea o ia ma tausi i ana poloaiga ua ia tuuina mai ia te i latou; ina ia latou maua pea lona Agaga e faatasi ma i latou. Amene” (MFF 20:77 ma le Moronae 4).

O le tatalo lenei o le vai:

“Le Atua e, le Tama Faavavau, matou te faatoga atu ia te oe i le suafa o lou Alo, o Iesu Keriso, ia e faamanuiaina ma faapaiaina lenei vai i agaga o i latou uma o e feinu ai, ina ia latou faia i le faamanatuina o le toto o lou Alo, sa faamaligiina mo i latou; ina ia latou molimau atu ia te oe, Le Atua e, le Tama Faavavau, latou te manatua pea o ia, ina ia latou maua lona

Agaga e faatasi ma i latou. Amene” (MFF 20:79 ma le Moronae 5).

E tatau ona vave tapena ese le faamanatuga mai le laulau i le taimi lava e uma ai le sauniga, A i ai se areto e totoe, e mafai ona faaoga e ai.

*O le faamanuiaina ma le tufaina o le faamanatuga e manaomia ai le faatagaga mai le taitai pulefaamalumalu.*

## **Faapaiaina o le Suauu**

E toatasi se alii (pe sili atu) o e umia le Perisitua Mekisateko e faapaiaina le suauu olive mama mo ona faamoe-moega paia o le faauuina lea o e mamai ma mafatia. O le na te faapaiaina le suauu e:

1. Uuina se fagu suauu olive ua tatala ese le tapuni.
2. Tau lo tatou Tama Faalelagi.
3. Tau atu faapea o loo ia faia i le pule o le Perisitua Mekisateko.
4. Faapaia le suauu (ae le o le fagu) ma faamanuiaina mo le faauuina o e mamai ma mafatia.
5. Faaiu i le suafa o Iesu Keriso.

## **Faauuina o e Mamai**

E na o alii o e umia le Perisitua Mekisateko e mafai ona faauuina e mamai pe mafatia. O le mea masani, e toalua pe sili atu foi e faauuina, peitai, e mafai foi ona fai e se tagata e toatasi. Afai e le o i ai se suauu ua faapaiaina, e mafai e se alii o loo umia le Perisitua Mekisateko ona tuuina atu se faamanuiaga i le pule o le perisitua.



O se tama o loo umia le Perisitua Mekisateko e tataua ona ia faauuina tagata mamai o lona aiga. E mafai ona ia talosagaina se isi alii o loo umia le Perisitua Mekisateko e fesoasoani atu ia te ia.

O le faauuina o e mamai e lua ia vaega: (1) faauuina i le suauu ma le (2) faamauina o le faauuga.

### **Fauuina i le Suauu**

E toatasi se alii e umia le Perisitua Mekisateko na te faauuina le tagata mai. O le faia o lona mea, na te:

1. Faatulutuluina sina mataua o le suauu paia itiiti i luga o le ulu o le tagata.
2. Tuu faamama ona lima i luga o le ulu o le tagata ma tau le igoa atoa o le tagata.
3. Tau atu faapea o loo ia faauuina le tagata i le pule o le Perisitua Mekisateko.
4. Tau atu faapea o loo ia faauuina i le suauu ua faapaiaina mo le faauuina ma le faamanuiaina o e mamai ma mafatia.

5. Faaiu i le suafa o Iesu Keriso.

### **Faamauina o le Faauga**

O le mea masani, e toalua pe sili atu ni alii e umia le Perisitua Mekisateko e tuu faamama o latou lima i luga o le ulu o le tagata ma'i. O se tasi o i latou e faamauina le faauuga. O le faia o lona mea na te:

1. Tau le igoa atoa o le tagata.
2. Tau atu faapea o loo ia faamauina le faauuga i le pule o le Perisitua Mekisateko.
3. Tuuina atu se faamanuiaga e pei ona taitaiina ai e le Agaga.
4. Faaiu i le suafa o Iesu Keriso.

### **Faamanuiaga Faatama ma isi Faamanuiaga o Faamafanafanaga ma Fautuaga**



O faamanuiaga faatama ma isi faamanuiaga o le perisitua e tuuina atu e avea ma taitaiga ma faamafanafanaga e pei ona taitaiina ai e le Agaga.

O se tama e umia le Perisitua Mekisateko e mafai ona ia tuuina atu faamanuiaga faatama i lana fanau. O faamanuiaga faapea e matuai aoga lava pe a o ese le fanau mai le aiga, e pei o le o i aoga po o misiona, pe o le a amata foi ona faigaluega, faaiipoipo, ulufale i le militeli, po o le feagai ai foi ma luitau tulaga ese faaletagata. O nei faamanuiaga e mafai ona avea ma malosiaga tele i se aiga. E mafai e se aiga ona tusitusia le faamanuiaga faatama mo faamaumauga faaleaiga, ae e le teuina i faamaumauga a le Ekalesia. E tatau i matua ona uunaia a latou fanau e saili atu mo faamanuiaga faatama i taimi latou te manaomia ai.

O alii agavaa o e umia le Perisitua Mekisateko e mafai foi ona tuuina atu faamanuiaga o faamafanafanaga ma fautuaga i o latou taitoalua, o tagata o le aiga lautele, ma isi tagata e talosagaina.

Ina ia tuuina atu se faamanuiaga faatama po o isi faamanuiaga o faamafanafanaga ma fautuaga, o se alii o loo umia le Perisitua Mekisateko, e tusa pe na o ia pe o i ai foi se isi alii po o nisi alii e umia le Perisitua Mekisateko o loo agavaa, e tuu faamama ona lima i luga o le ulu o le tagata o loo tuuina atu i ai le faamanuiaga. E le tau manaomia se suauu mo ia ituaiga o faamanuiaga. O le tagata o loo tuuina atu le faamanuiaga na te:

1. Tau le igoa atoa o le tagata.
2. Tau atu faapea o loo ia tuuina atu le faamanuiaga i le pule o le Perisitua Mekisateko.
3. Tuuina atu se faamanuiaga e pei ona taitaiina ai e le Agaga.
4. Faaiu i le suafa o Iesu Keriso.

## **Faapaiaina o Tuugamau**

O se tagata na te faapaiaina se tuugamau e tatau ona ia umia le Perisitua Mekisateko ma e *tatau ona faatagaina e le taitai perisitua o loo taitaia le sauniga.*

Ina ia faapaiaina se tuugamau, na te:

1. Tau le Tama Faalelagi.
2. Tau atu faapea o loo ia faapaiaina le tuugamau i le pule o le Perisitua Mekisateko.
3. Faamanuia ma faapaia le tuugamau e avea o se nofoaga e malolo i ai le tino o le ua maliu.
4. Afai e talafeagai ai, tatalo ina ia faapaiaina le nofoaga ma puipuia seia oo i le Toetu.
5. Ole atu i le Alii e faamafanafana le aiga ma tuuina atu isi lagona e pei ona taitaiina ai e le Agaga.
6. Faaiu i le suafa o Iesu Keriso.

Afai e mananao ai le aiga, e mafai ona faia se tatalo i tafatafa o le tuugamau e se tagata (o se tasi o loo umia le Perisitua Mekisateko) nai lo se tatalo o le faapaiaiga.

# O Le Mauaina o Tusi ma Mea e Faaaoga a le Ekalesia ma le Sailia o Faamatalaga i Talafaasolopito o Aiga

---

E mafai e taitai o le lotoifale ma isi tagata lotu ona maua ia tusi ma mea e faaaoga a le Ekalesia, e aofia ai tusitusiga paia, o mataupu e suesueina, o mekasini a le Ekalesia, ofusa, ma laei o le malumalu, mai o latou faletusi autu o le Ekalesia po o ofisa autu mo auaunaga, mai le Faletusi Tutotonu i Sate Leki, pe ala mai foi i le tuatusi faavaomalo a le Ekalesia i le initoneti i le [www.lds.org](http://www.lds.org).

O faamatalaga e uiga i talafaasolopito o aiga po o galuega tau gafa, o loo maua i le tuatusi faavaomalo o talafaasolopito o aiga i le Initoneti, lea e maua i le [www.familysearch.org](http://www.familysearch.org).



O LE EKALEZIA A  
**IESU KERISO**  
O LE AU PAIA O ASO  
E GATA AI

SAMOAN



4 02311 80890 8

31180 890